

梁

書

列傳第一

梁書七

散騎常侍姚

思廉

撰

太祖張皇后

高祖郗皇后

太宗王皇后

高祖丁貴嬪

高祖阮脩容

世祖徐妃

易曰有天地然後有萬物有萬物然後有男女

有男女然後有夫婦夫婦之義尚矣哉周禮王者立后六宮三夫人九嬪二十七世婦八十一御妻以聽天下之內治故昏義云天子之與后猶日之與月陰之與陽相須而成者也漢初因秦稱號帝母稱皇太后后稱皇后而加以美人良人八子七子之屬至孝武制婕妤之徒凡十四等降及魏晉母后之號皆因漢法自夫人以下世有增損焉高祖撥亂反正深鑒奢逸惡衣菲食務先節儉配德早終長秋曠位嬪嬙之數無

所改作太宗世祖出自儲藩而妃並先殂又不
建椒闈今之撰錄正備闕云

太祖獻皇后張氏諱尚柔范陽方城人也祖次
惠宋濮陽太守后母蕭氏即文帝從姑后宋元
嘉中嬪於文帝生長沙宣武王懿永陽昭王敷
次生高祖初后嘗於室內忽見庭前菖蒲生花
光彩照灼非世中所有后驚視謂侍者曰汝見
不對曰不見后曰常聞見者當富貴因遽取吞
之是日產高祖將產之夜后見庭內若有衣冠

陪列焉次生衡陽宣王暢義興昭長公主令嫔
宋泰始七年殂于秣陵縣因夏里舍葬武進縣
東城里山天監元年五月甲辰追上尊號為皇
后諡曰獻父穆之字思靜晉司空華六世孫曾
祖輿坐華誅徙興古未至召還及過江為丞相
掾太子舍人穆之少方雅有識鑒宋元嘉中為
直外散騎侍郎與吏部尚書江湛太子左率袁
淑善淑薦之於始興王濬濬深引納焉穆之鑒
其禍萌思違其難言於湛外出湛將用為東縣

固乞遠郡久之得爲寧遠將軍交趾太守治有
異績會刺史死交土大亂穆之威懷循拊境內
以寧宋文帝聞之嘉焉將以爲交州刺史會病
卒子弘籍字眞藝齊初爲鎮西參軍卒於官高
祖踐阼追贈穆之光祿大夫加金章又詔曰亡
舅齊鎮西參軍素風雅猷夙有名輩降年不永
早世潛輝朕少離苦辛情地彌切雖宅相克成
輅車靡贈興言永往觸目慟心可追贈廷尉卿
弘籍無子從父弟策以第三子續爲嗣別有傳

高祖德皇后郗氏諱徽高平金鄉人也祖紹國
子祭酒領東海王師父燁太子舍人早卒初后
母尋陽公主方娠夢當生貴子及生后有赤光
照于室內器物盡明家人皆怪之巫言此女光
采異常將有所妨乃於水濱祓除之后幼而明
慧善隸書讀史傳女工之事無不開習宋後廢
帝將納爲后齊初安陸王緬又欲婚郗氏並辭
以女疾乃止建元末高祖始娉焉生永興公主
王姚永世公主王婉永康公主王嬭建武五年

高祖爲雍州刺史先之鎮後乃迎后至州未幾
永元元年八月殂于襄陽官舍時年三十二其
年歸葬南徐州南東海武進縣東城里山中興
二年齊朝進高祖位相國封十郡梁公詔贈后
爲梁公妃高祖踐阼追崇爲皇后有司議諡吏
部尚書兼右僕射臣約議曰表號垂名義昭不
朽先皇后應祥月德比載坤靈柔範陰化儀形
自遠倪天作合義先造舟而神猷風掩所隔升
運宜式導景行用昭大典謹按諡法忠和純備

曰德貴而好禮曰德宜崇曰德皇后詔從之陵
曰脩陵后父燁詔贈金紫光祿大夫燁尚宋文
帝女尋陽公主齊初降封松滋縣君燁子泛中
軍臨川王記室參軍

太宗簡皇后王氏諱靈賓琅邪臨沂人也祖儉
太尉南昌文憲公后幼而柔明淑德叔父暕見
之曰吾家女師也天監十一年丁拜晉安王妃生
哀太子大器南郡王大連長山公主妙翫大通
三年十月拜皇太子妃太清二年三月薨于永

福省時年四十五其年太宗即位追崇爲皇后
謚曰簡大寶元年九月葬莊陵先是詔曰簡皇
后窀穸有期昔西京霸陵因山爲藏東漢壽
陵流水而已朕屬值時艱歲飢民敝乏欲以身率
下永示敦朴今所營壯陵務存約儉又詔金紫
光祿大夫蕭子範爲哀策文父憲字思寂本名
玄成與齊高帝偏諱同故改焉以公子起家員
外郎遷太子洗馬襲封南昌縣公出爲義興太
守還爲驃騎諮議累遷黃門郎司徒右長史性

疑簡不狎當世嘗從容謂諸子曰吾家門戶所
謂素族自可隨流平進不須苟求也永元末遷
侍中不拜高祖霸府建引爲大司馬詔議參軍
俄遷侍中領越騎校尉高祖受禪詔曰庭堅世
祀靡輟於宗周樂毅錫壤乃昭於洪漢齊故太
尉南昌公含章履道草昧興齊謨明翊贊同
符在昔雖子房之蔚爲帝師文王之隆比王佐
無以尚也朕膺歷受圖惟新寶命卽莘莘玉帛
升降有典永言前代敬惟徽烈匪直懋勲義兼

懷樹可降封南昌縣公爲侯食邑千戶騫襲爵
遷度支尚書天監四年出爲東陽太守尋徙吳
郡八年入爲太府卿領後軍將軍遷太常卿十
一年遷中書令加員外散騎常侍時高祖於鍾
山造太愛敬寺騫舊墅在寺側有良田八十餘
頃即晉丞相王導賜田也高祖遣主書宣旨就
騫求市欲以施寺騫荅旨云此田不賣若是敕
取所不敢言酬對又脫略高祖怒遂付市評田
價以直逼還之由是忤旨出爲吳興太守在郡

卧疾不視事徵還復爲度支尚書加給事中領射聲校尉以母憂去職普通三年十月卒時年四十九詔贈侍中金紫光祿大夫諡曰安子規襲爵別有傳

高祖丁貴嬪諱令光譙國人也世居襄陽貴嬪生于樊城有神光之異紫煙滿室故以光爲名相者云此文當大貴高祖臨州丁氏因人以聞貴嬪時年十四高祖納焉初貴嬪生而有赤痣在左臂治之不滅至是無何忽失所在事德皇

后小心祇敬嘗於供養經案之側髣髴若見神
人心獨異之高祖義師起昭明太子始誕育貴
嬪與太子留在州城京邑平乃還京都天監元
年五月有司奏爲貴人未拜其年八月又爲貴
嬪位在三夫人上居于顯陽殿及太子定位有
司奏曰禮母以子貴皇儲所生不容無敬宋泰
豫元年六月議百官以吏敬敬帝所生陳太妃
則宋明帝在時百官未有敬臣竊謂母以子貴
義著春秋皇太子副貳宸極率土咸執吏禮旣

書傳
盡禮皇儀則所生不容無敬但帝王妃嬪義與
外隔以理以例無致敬之道也今皇太子聖睿
在躬儲禮夙備子貴之道抑有舊章王侯妃
主常得通信問者及六宮三夫人雖與貴嬪同
列並應以敬皇太子之禮敬貴嬪宋元嘉中始
興武陵國臣並以吏敬敬所生潘淑妃路淑媛
貴嬪於宮臣雖非小君其義不異與宋泰豫朝
議百官以吏敬敬帝所生事義正同謂宮闈施
敬宜同吏禮詣神獸門奉牋致謁年節稱慶亦

同如此婦人無閫外之事賀及問訊牋什所由
官報聞而已夫婦人之道義無自專若不仰繫
於夫則當俯繫於子榮親之道應極其所榮未
有子所行而所從不足者也故春秋凡王命爲
夫人則禮秩與子等列國雖異於儲貳而從尊
之義不殊前代依准布在舊事貴嬪載誕元良
克固大業禮同儲君實惟舊典尋前代始置貴
嬪位次皇后爵無所視其次職者位視相國爵
比諸侯王此貴嬪之禮已高朝列况母儀春宮

義絕常筭且儲妃作配率由盛則以婦踰姑彌
乖從序謂貴嬪典章太子不異於是貴嬪備典
章禮數同于太子言則稱令貴嬪性仁恕及居
宮內接馭自下皆得其歡心不好華飾器服無
珍麗未嘗爲親戚私謁及高祖弘佛教貴嬪奉
而行之屏絕滋腴長進蔬膳受戒日甘露降于
殿前方一丈五尺高祖所立經義皆得其指歸
尤精淨名經所受供賜悉以充法事普通七年
十月庚辰薨殯於東宮臨雲殿年四十二詔吏